



*Ioseph prisonnier expose les songes du maistre Sommelier, & du maistre Panetier du Roy Pharaon.*



PR ES ces choses aduint que le grand Sommelier, & le grand Panetier du Roy Pharaon furent constituez prisonniers, où Ioseph estoit aussi prisonnier, lequel eut la charge d'eux : ils songerent tous deux en vne mesme nuit des songes, qui les attristerent. Ioseph les voyant si tristes, leur demanda l'occasion, & chacun d'eux luy recita son songe. Le Sommelier dit : En songeant il me sembla que ie voyois trois seps de vigne, dont les grappes meurissoient, desquelles ie pressois le raisin en la coupe du Roy, que ie tenois, puis la baillois en sa main. Et Ioseph luy dit, La signification en est bonne, c'est que dans trois iours tu seras rétably en ton estat. Et ie te prie qu'il te souuienne de moy, & fais mention au Roy de mon innocence. Le Panetier ayant entendu cette bonne interpretation, raconta aussi à Ioseph qu'il auoit songé qu'il portoit trois corbeilles de farine sur sa teste, & qu'en la plus haute y auoit de toute sorte de pains, & les oyseaux les mangeoient. Ioseph luy dit, P'aymerois mieux t'interpreter du bien : car d'icy à trois iours tu seras pendu, & les oyseaux mangeront ta chair. Ce qui aduint ainsi que Ioseph l'auoit déclaré, & le Sommelier le mit en oubly : partant demeura encore Ioseph deux ans en prison.